

欽  
定  
全  
唐  
文

欽定全唐文卷三百四十三目錄

顏真卿 八

有唐開府儀同三司行尚書右丞相上柱國贈太尉廣平文貞公宋公神道碑銘

朝議大夫贈梁州都督上柱國徐府君神道碑銘  
中散大夫京兆尹漢陽郡太守贈太子少保鮮于公神道碑銘

遊擊將軍左領軍衛大將軍兼商州刺史武關防禦使上柱國歐陽使君神道碑銘

欽定全唐文卷三百四十三

顏真卿

有唐開府儀同三司行尚書右丞相上柱國贈太

尉廣平文貞公宋公神道碑銘

於戲逆鱗廟上匡救之義溪守死不回人臣之致極況乎  
文包風雅道濟生靈建一言而天下倚平含九德而三光

式序超無友而獨立者其惟廣平公乎公諱璟字

闕二邢

州南和人其先出於殷王元子七代祖弁魏吏部尚書襲  
列人子祖欽道北齊黃門侍郎並事跡崇高各見本傳高

祖元節定州田曹曾祖宏俊大理丞祖務本皇櫟陽令父  
元撫衛州司戶贈戶部尚書自田曹至於尚書皆實浮於  
名而位不充量事見許公蘇頌所撰神道碑公七歲能屬  
文一遍誦鵬鳥賦丁尚書府君憂水漿絕口者五日八九  
歲時嘗夢大鳥銜書吐公口中公吞之遂乘而直上倏忽  
驚寤猶若下在甕間自後藻思日新襟懷益爽年十六七  
時或讀易曠時不精公遲而覽之自亥及寅精義必究明  
年進士高第補上黨尉轉王屋主簿相國蘇味道爲侍御  
史出使精擇判官奏公爲介公作長松篇以自興梅花賦

以激時蘇溪賞嘆之曰眞王佐才也轉合宮尉長壽三年  
從調判入高等有司特聞天后親問所欲公以代爲唐臣  
不求榮達詭奏云家本山東願得魏之一吏遂手詔授錄  
事參軍拜舞趨出后異而召還又手詔拜監察御史裏行  
尋丁齊國太夫人憂服闋築室反耕志圖不起俄而卽眞  
遷殿中侍御史同列有博於臺中者將貴名品而黜之博  
者惶恐自匿翌日公獨正辭引過天后悅而釋之遷天官  
員外郎鳳閣舍人御史中丞乃謂所親曰吾比欲優遊自  
免不圖要近驟至於斯其敢廢所職乎乃悉心納忠無所

迴避時張易之昌宗兄弟席寵脅權天下側目公危冠入  
奏奮不顧身天后失色蒼黃欲起公叩頭流血誓以死爭  
拾遺李邕奏曰陛下坐則天下安起則天下危內史令敕  
公出公曰天顏咫尺親奉德音不勞宰臣擅宣王命詞氣  
慷慨左右震悚遂俱攝詣臺庭立切責二豎股栗氣索不  
敢仰視自朝至於日昃敕使馳救之公不得已而罷又令  
詣公謝罪公拒之後有慘恤二豎來弔公辭曰貴近不宜  
與執法通同假滿朝士慰公二豎又欲序進公舉板迎揖  
之不得成禮而去神龍之興復也公實佐其謀及當疇庸

讓而不受曰清宮問罪事出五王祀夏中與功歸明主非  
曰逃賞誰敢貪天俄拜朝散大夫吏部侍郎兼諫議大夫  
遷黃門侍郎嘗遇梁王武三思於朝三思方欲言事公正  
色謂之曰當今復子明辟王宜以侯就第何得尚干朝政  
三思慚懼而退請急累月俄而兼攝尚書左丞中宗將幸  
西蜀淡虞北鄙乃兼檢校并州大都督府長史又改兼貝  
州刺史與數人同辭三思獨揖公住公顧謂之曰諸人已  
出不可獨留遂揖之而去屬年穀不登國租罷入三思食  
邑公悉蠲之既屢挫其鋒亦處之自若俄而真拜轉杭州

又復遷相州尋入爲洛州長史唐隆初拜吏部尚書同中書門下三品粵五日兼右庶子尋加銀青光祿大夫元宗之在儲闈鎮國太平長公主潛謀廢立嘗於光範門內坐步檐中諷宰臣以此旨諸相失色莫敢先言公盛氣詰之曰東宮有大功宗廟社稷主也安得異議遂奏婦人干政恐生禍階請不令朝謁俄而男又縱橫公奏之繇是貶楚州刺史主亦竟以凶終無何復拜銀青歷魏兗冀三州兼河北按察使尋遷幽州都督兼御史大夫復爲魏州入爲國子祭酒東都留守開元二年尋拜御史大夫兼京兆尹



貶睦州刺史轉廣州都督充按察經略計擊使又兼御史大夫特許便宜從事前是首領桀驁多據洞不賓公之下車無敢不聽彼之風俗競趨苟簡茅茨竹檐比屋鱗次火災歲起煨燼無餘公教之度材變以陶瓦千甍齊翼萬堵皆興於今賴焉燕國公張說著爲碑頌無何使中官楊思勛召公公拜恩而就馬便行在路竟不交一言思勛以將軍貴幸泣訴於帝帝嗟嘆久之拜刑部尚書四年遷吏部兼黃門監監修國史五年改號侍中明年駕幸東都至三嶠馳道險隘行不得前河南尹李朝隱知頓使中丞王怡

並坐當降黜公奏曰必若致罪二臣將來必受其弊遂命公舍之曰陛下責之以臣免之是過歸於上恩由於下臣請使且待罪然後俾其復職上嘉而從之元宗嘗命公名諸皇子及公主邑號旣而又令各定一美名公奏稱七子均養鵠鳩之德錫以名號不宜有殊若母寵子愛恐非正家之道王化所宜元宗悅而從之八年拜開府儀同三司進爵廣平郡開國公策勲上柱國狂豎權梁山構逆長安有司浚揆其獄敕公按覆如京兆司錄李如璧等百餘家皆以借宅假器悉當連坐公以婚姻假借天下大同至於

京城其例尤衆知情卽是同反無罪不合論辜凶渠之外一切原免天下欣服焉中書令河東張公傑出將明之材獨運廟堂之上鏡機朗澈見事風生求公規模悉閱堂案每至危言讜議執正守中未嘗不廢卷失聲汗流浹背其爲通賢所服也如此十三年駕幸東都以公爲西京留守公極言得失無有所隱元宗感悅制曰所奏之言置之座右出入觀省以誠終身因賜綵物二百匹明年又兼吏部十七年拜尚書右丞相雅善戲謔不常矜莊與故戶部尚書王峻爲莫逆之友晚而彌篤凡所談諧人輒疏取端五

日蒙賜鍾乳命醫歸鍊或以爲上藥異味不宜委之公曰  
推誠求信猶懼不應猜以待人信其可得聞者慚退二十  
一年抗疏告老至於再三手詔優許遂特給全祿賜絹五  
百匹還東京公以爲大臣歸休不宜關通人事遂杜絕賓  
客其年駕幸洛陽公迎拜道左元宗親駐龍蹕使榮王琬  
勞問者數四自後中使往來賞賚不絕方崇乞言之典以  
極師臣之敬二十五年仲冬月十九日寢疾薨於東都明  
教里第享年七十五天下失聲元宗震悼追贈太尉諡曰  
文貞公賻物米粟常數有加喪葬官供仍詔河南少尹崔

釋之充監護使夫人齊國夫人博陵崔氏滄州長史藝之  
女淑慎嚴整高明柔克訓諸子而慈且有威佐丞相而德  
無違者門內之理一以見咨躡公而歿允終偕老嗚呼公  
有七子復同州司功先公而卒昇尚書郎太僕少卿尚漢  
東太守渾職方郎中諫議大夫御史中丞東京畿採訪使  
太子左諭德恕都官郎中延原少尹華判入高等登封尉  
尉氏令衡右散騎常侍兼御史中丞河南節度行軍司馬  
或肅或乂或哲或謀克篤前烈以休令聞以戊寅歲五月  
二十九日虔奉遺約歸葬公於沙河縣太尉鄉丞相原之

先塋夫人合而祔焉禮也惟公間氣降神應期傑出生知  
禮度天縱才明玉立殿天子之拜介然秉大臣之節震電  
憑怒讜言而不有厥躬鼎鑊沸前臨事而義形於色蠡迪  
檢押難常情之所易志淡直諒易古人之所難外其身而  
富貴不離行其道而死生勿替非夫合一之德格於皇天  
不二之心形於造次則何以異是乎允所謂振古之元龜  
皇王之威寶者矣且夫公之德烈充塞寰寓公之謀猷著  
明日月大厯五年冬十二月孫儼懼遺盛美不遠求蒙以  
真卿天祿校文叨太僕之下列憲臺執簡承諭德之渙知

雖青史傳信實錄已編於方冊而豐碑勒銘表墓願備於  
論譔謹憑吏部員外郎盧僎所上行狀略陳萬一多恨闕  
遺其辭曰

天命元鳥降而生商湯孫之緒微子分疆詞招正則尉翼  
文皇吏部黃門紛綸耿光忠賢世出信史相望篤生丞相  
祚我有唐文明純嘏毅烈堅剛恒衛間氣星辰降芒熒然  
山立鏗爾金鏘忠孝之盛人倫紀綱垂髫能文夢鳥發祥  
通夕究易沖齡擅場勝冠結綬歷政洋洋乃尉合宮貳輶  
琅琅賦嗤梅豔篇美松長蘇公嗟稱才必佐王滿歲從調

試言高驤登聞黼辰驟列繡裳遶跡天官如圭如璋司言  
鳳閣綸綍煌煌乃作中丞威棱莫當志除凶狡廷劾二張  
天后愕眙百寮震惶公獨凜然出身激昂義形言色精貫  
穹蒼皇室中興嘉謨克彰功成牢讓事軼屠羊貳職選曹  
諫議是匡載清流品屢奏封章乃侍瑣闥時維夕郎悉心  
糾正庶績咸康三思睢盱席寵干常責之就第慚懼靡亢  
左曹攝轄大鹵於襄兼刺貝邱朋辭鴈行三思揖語公獨  
循牆處之不忤轉旆於杭旣遷鄴城遂尹洛陽乃作冢宰  
訐謨廟堂俄兼宮相亟綰銀黃元宗登儲鎮國是遑潛謀



廢立謠詠相翔厥男撓政累奏愆殃聿臨楚邦洊察冀方  
總督幽薊翻飛國庠亞相烈烈尹京趙趙旋臨建德歟莅  
南荒俚帥咸旣茅鴇是攘張公頌德雋咏甘棠所忠來召  
拜命卽裝略無交言帝用式臧載司刑吏八座抑揚兼監  
黃樞鈞軸是將匪躬蹇蹇終始洸洸乃拜儀同允釐保障  
河東閱故汗洽流漿狂豎犯闕凶渠旣戕命公覆獄咸脫  
死亡乃涉右揆讜論泱泱每諱王君豈常矜莊懸車告老  
庶保康強方崇饋醕孤映縑緇天不憖遺萎哲壞梁一人  
震悼九有淒涼市旣罷賈春仍絕糧乃贈太尉飾終禮滂

返葬沙河羽儀央央闔朝傾祖河尹護喪生榮死哀行路  
感傷令人孺慕攀泣嗶嗶高墳崔嵬鉅鹿劇旁森梢宰樹  
繚繞連岡吁嗟廣平宅此不暘孝孫翼翼論譔靡忘豐碑  
堅碣萬古訾相

朝議大夫贈梁州都督上柱國徐府君神道碑銘

自古遭聖明而功不立都卿相而名不稱者蓋有之矣其  
或荷丕構而繼志不忘在下位而能伸其道克揚前列以  
承後昆其唯徐君乎君諱秀

唐書宰相世系表作琇

東海郟人也其

先出於伯益實掌舜虞裔孫偃王躬行仁義遂因國命氏

焉厥後樂以文侍金門稱以禮優塵榻僊人寄傲於賢聖  
偉長首冠於應劉英達相仍有自來矣宋有中書侍郎逵  
之司空羨之兄祕書監欽之欽之子尚書僕射中書令湛  
之湛之生黃門侍郎聿之聿之生齊太尉孝嗣孝嗣生梁  
侍中緄生陳五兵尚書君敕君敕生丹陽尹溫自司空  
已還四爲上公五降帝女尹生隋民部侍郎唐贈祕書監  
諱恕監生金紫光祿大夫右散騎常侍兼禮部尚書諱筠  
尚書生庫部郎中萬年令太子詹事諱昕宰相世系表云  
孝嗣生齊侍中  
緄生陳常侍君敷君敷生隋通事舍人榮榮生  
尚食直長恕恕生春官尚書枝江公筠筠生昕  
皆以盛

德濟美垂於世家君卽詹事第三子也幼而聰悟篤學能屬文事繼親以孝稱十餘歲時父友鳳閣侍郎姚元崇示君五百字詩一覽便誦姚公奇之因謂納言狄公曰徐子珠華玉潔後但不知命何如耳年十五爲崇文生應舉考功員外郎沈佺期再試東堂壁畫賦公援翰立成沈公駭異之遂擢高第調補幽都縣尉充相國尚書趙彥昭朔方節度判官以事去職又歷蔡州參軍爲御史宋遙關內覆囚判官公銳精鞫訊多所全活宋公以爲言公正色謂之曰僕從祖父司刑卿天授中詳理冤獄振雪者七十餘家

今子孫猶困於襄陵豈忍以束溼之事以自便也因頓首  
請去宋謝而留之無何或訟冤於執事者召公問狀則他  
判官之爲也宋欲別白旌公公曰僕雖不材豈可藉人之  
過以爲已功乎論者休之戶部侍郎徐知仁請爲招慰南  
蠻判官奏課居最轉瀛州司法參軍侍御史趙頤貞辟宣  
慰判官歷湖州德清長城潤州丹陽三縣令天寶二載春  
二月加朝散大夫敕攝新安郡別駕採訪使齊澣梁昇卿  
並奏爲判官六載秋七月拜臨淮郡長史加朝請大夫九  
載夏四月除濟南郡司馬加朝議大夫十二載春三月拜

信都郡長史不幸感疾天寶十三載秋七月九日終於郡之官舍春秋七十公先世塋壠宅於京師少陵原詹事府君巡按河南薨於洛汭因葬於緱氏縣西南大寇原公啓手足也顧命其子今侍御史續曰吾家代儉約不欲華衆歸全之後其以布車一乘虔祔先塋續泣而奉之及其葬也塋小無便地於次東馬鞍山下得紫龍飲乳岡之原龜筮從也夫人南陽縣君樊氏戶部尚書子蓋之曾孫袁州刺史文器之孫廬江太守季節之女仁孝柔明嫻於禮度左右圖史雅善琴碁中外孤弱躬自收視俾夫遠近咸懷

安之春秋六十有八棄堂帳於相州之安陽天寶十五載  
秋八月十有四日爰遵周公之典而合祔焉禮也廣德二  
年春二月皇帝有事於南郊追贈君都督梁州諸軍事梁  
州刺史夫人南陽郡太君蓋以續簪白筆於赤墀董材賦  
於巴漢是用有永錫之寵紆褒崇之命哀榮之盛不其至  
矣君凡四爲綱佐六奉使軒所至之邦必聞異績舉天下  
之政事莫不資折中焉性嗜清貧室無長物孤煢叢萃皆  
仰於君旣嬰沈痼之疾縣歷三載續請就上國之醫庶其  
逢吉君曰闔門之資者寸祿也今疾劇命也吾不以一身

易百口竟不從而歿識者哀之或謂君曰君奉養嫠姊用

度萬錢

闕一字

賑諸姑縑纔五兩姑見君

闕三字

笑而不答退

謂續曰吾見其撫孤不見其怨德教義之士有以見其用

心也君恬淡寡欲雅好攝生在新安或指靈叟於洞君齋

心四日采入其阻而後覲之訊其由來陳思王東閣祭酒

蔣覲也說魏時事歷歷可聽君稽首而靳之叟曰從我乎

必可度世君以王事靡盬退而辭焉比迴顧則爲茅草矣

初君上計濟南展羣祖之墓松檟森然薇猷莫紀留居論

譏時日以成先德之不忘繫是舉也嗚呼君體聰穎之上



姿恬曠之夷度寬明足以濟衆和義足以長人口絕莠言  
目無還視立身先張仲之志與朋服子路之言內行可以  
質神明清規可以勵風俗宜克享胡耆荷天之龍光輔乎  
漢之得人高視乎周之列位而道之將喪命不偶時屈與  
驥於身前墮峴碑於歿後吁足歎也春秋貴九世卿族漢  
史稱七葉珥貂陪臣於下士卑僚絕屬於天潢戚里豈比  
夫登台者四世尚主者五人焜耀於數朝之間蟬聯於百  
代之下可同年而語矣續懿文懋學峻節清標天寶末陷  
居賊中爲僞命連辟辭疾不起謀使家人與本朝通計爲

部曲所發遂遭禁詰一日之中議刑者數焉俄而官軍大  
至賊黨奔北由是獲免乾元中奉使巴渝屬段子璋搆逆  
流輩十人皆被屠害以續高名欲留同惡期之以死承劒  
不回時諸道徵求人不堪命續至之邦必荷仁信如期而  
畢則闕三字將崇必復之矣寧止當朝之望碑銘功伐敢墜  
斯文其辭曰

益爲帝虞偃不異途世表東海其惟徐乎或文或武或哲  
或儒休美後昆厥德不孤猗那都督克懋遠圖邦國四佐  
輶軒六徂樹聲長世與道爲徒爰覲幽光無寧集枯闕八字

仁義都盡彭殤曷殊所嗟人紀莫展嘉謨馬鞍山北龍乳  
岡隅於焉崇祔先志靡渝豐碑崔嵬宰樹縈紆闕沾濡闕  
中散大夫京兆尹漢陽郡太守贈太子少保鮮于

公神道碑銘

公諱向字仲通以字行漁陽人也其先出於殷太師周武  
王封於朝鮮子仲食邑於于因而受氏漢有京兆尹褒褒  
十二世孫康後魏秦州刺史直閣將軍武威郡公忠於本  
朝爲齊神武所害康元孫匡贊隋冠氏長義寧初通議大  
夫匡贊生士簡士迪並早孤爲叔父隆州刺史匡紹所育

因家於新政士簡士迪皆魁岸英偉以財雄巴蜀招徠賓  
客名動當時郡中憚之呼爲北虜士簡生令徵公之父也  
倜儻豪傑多奇畫嘗傾萬金之產周濟天下士大夫與妻  
兄著作郎廣漢嚴從臬殿中侍御史何千里俱以氣槩相  
高不肯仕官竟以壽終天寶九載贈遂寧郡太守廣德元  
年又贈太常卿公少好俠以鷹犬射獵自娛輕財尚氣果  
於然諾年二十餘尚未知書太常切責之縣南有離堆山  
斗入嘉陵江形勝峻絕公乃慷慨發憤屏棄人事鑿石構  
室以居焉勵精爲學至以鍼鉤其臉使不得睡讀書好觀

大略頗工文而不好爲之開元二十年年近四十舉鄉貢  
進士高第二十六年調補益州新都尉視事二十日謝病  
去二十七年長史張宥奏充劔南採訪支使宥方謀拔安  
戎獨與公計畫幕中之事一以咨公司馬章仇兼瓊惡之  
及代宥節度乃移郡收公月餘仍釋之俄令攝判使事監  
越騫兵馬復奏充採訪支使盡護劔南軍事首尾二載冒  
暑渡瀘者凡一十八度公秉操堅忮吏人望而畏之改授  
新繁尉充山南西道採訪支使頃之雲南蠻動瓊請公往  
以便宜從事公戮其尤害者數人蠻夏懾服山南盜賊舊

多光火公察其名居悉傾巢穴人到於今賴焉俄拜左衛  
兵曹例遷也瓊以兩道採訪節度使務悉以委公無何攝  
監察御史充劔南山南兩道山澤使遷大理評事充西山  
督察使天寶五載戶部侍郎兼御史大夫郭公虛已代瓊  
節制郭以庶務一皆仗公公素懷感激竭誠受委故幕府  
之事無遺諂焉六載拜監察御史公誅羌豪董哥羅等數  
十人以靖八州之地郭公將圖弱水西之八國奏公入覲  
元宗駭異之卽日拜尚書屯田員外郎兼侍御史蜀郡司  
馬劔南行軍司馬旣略三河收其八國長驅至故洪州與

哥舒翰隴右官軍相遇於橫嶺鳴鼓而還及郭公云亡慟  
哭之曰公亡矣吾無爲爲善乎初郭公對敎天休每薦公  
有文武之材堪方面之寄至是遂拜公爲蜀郡大都督府  
長史兼御史中丞持節充劔南節度副大使公當大任旣  
竭丹誠射討吐蕃摩彌城拔之改洪州爲保寧都護府塹  
弱水爲蕃漢之界收戶數十萬闢土千餘里屬恩敕命召  
祇赴京師至臨皋驛上令中貴人勞問賜甲第一區又錫  
名馬兼供御饌俄拜司農卿將不遠而復十一載拜京兆  
尹公威名素重處理剛嚴公初善執事者後爲所忌十二

載遂貶邵陽郡司馬灌園築室以山泉琴酒自娛賦詩百  
餘篇俄移漢陽郡太守下車閉閣唯讀元經以自適不幸  
感疾以十四載閏十有一月十有五日終於官舍春秋六  
十有二十五載春正月歸葬於新政縣嘉陵江之西岸先  
塋寶應元年追贈衛尉卿廣德元年又贈太子少保公凡  
著坤樞十卷文集十卷並爲好事者所傳於戲公負不羈  
之才懷當世之志方及知命始擢一第從宦十年超登四  
岳拔身巴江之下自致青雲之上非夫珪璋特達聖賢相  
遭則何以凌厲沈浮若斯之速旣而吉凶糺纏慶弔相隨



天睠排於賊臣雄圖屈於促景有足悲矣有子六人仲曰  
贈左金吾衛郎將昊隨公陷於西洱河力戰而歿季曰前  
鄉貢明經晃神清才秀先公而卒伯曰璧州刺史昱克篤  
孝行見稱衣冠公之捐館也萬里迎喪泝湍而輟瘞拔筴  
段子章之稱亂也閤門逃賊安親而晨夕板輿叔曰萬州  
刺史炅雅有父風頗精吏道肅宗之幸鳳翔也竭誠幕府  
以佐公家今上之命庶僚也由華原之政驟登省闈作牧  
萬州政績尤異有詔遷祕書少監尋又改牧巴州幼曰青  
城尉晏稚曰成都府參軍景皆保家之主亦著令聞公弟

晉字叔明敦厚溫敏少以任俠聞事公以悌稱與朋以信著好讀書而不爲章句精吏道而尤擅循良再爲法官三秉天憲二登郎署一宰洛陽從其兄之討南蠻也兩軍交戰仗忠信而必使其間佐寧國之如回紇也絕域奉辭布皇明而皆得要領肅宗褒異擢拜商州刺史無何超遷京兆尹不十年而兄弟相代論者偉之永泰二年秋八月有詔自太子左庶子復拜爲邛州刺史兼御史中丞邛南八州都防禦觀察等使真卿與公同在御史亡兄國子司業允南弟今江陵少尹允臧又與少尹同時臺省旣接通家

之歡載敦世親之好以爲徂謝永久所存者徽猷陵谷雖  
遷不朽者金石銘功篆美敢墜所聞其詞曰

洪範垂休系殷封周鮮于身絲派漁陽兮世掌漢厯子孫  
烏奕代有不績泉定襄兮冠氏促齡二孫夙丁隋官不寧  
肇定疆兮嘉陵森森雲臺矯矯降生京兆爲龍光兮有武  
有文剛嚴不羣克懋鴻勳制惟梁兮旣靖巴蜀旣清輦轂  
日聞啓沃播周行兮結友不終孤我淡衷如彼飛蟲反予  
戕兮邵陽典午漢陽紆組熟云心苦坦行藏兮天不憖遺  
哲人其萎反葬江湄咥其傷兮此令有裕教忠有素天介

景祚熾而昌兮三世京尹二子專城一門載榮餘慶彰兮  
豐碑巍巍盛業暉暉舉世是希與天長兮

遊擊將軍左領軍衛大將軍兼商州刺史武關防  
禦使上柱國歐陽使君神道碑銘

使君諱璿字子璿渤海人其先出自帝顓頊高陽氏漢有  
歐陽伯和伯和孫高高孫地餘並列儒林晉有堅石著名  
文苑賢達繼軌其來邈乎六代祖僧寶始自渤海徙居長  
沙五代祖頽陳山陽郡公高祖紇陳開府儀同三司左屯  
衛大將軍交廣等十九州諸軍事廣州刺史襲山陽郡公

功業並著於前史曾伯祖詢皇朝銀青光祿大夫給事中  
率更令崇賢館學士以詞學德行見重前朝筆法孤標垂  
名不朽曾祖允年十七以名門子入侍見賞於太宗十八  
加正議大夫魯王傅奉使和突厥不拜虜廷朝廷嘉之回  
封南海郡公施光二州刺史祖諶洛州鞏縣令父機漢州  
什邡令以休懿傳世著聞於家邦使君卽什邡之第四子  
志尚恬曠顓精於詩易春秋尤明吏術所居則理開元十  
八年解褐安西大都護府參軍充陽集本作湯嘉惠節度推勾  
官外憂去職服闋補北庭大都護府戶曹參軍節度使蓋

嘉運奏授金滿令仍充營田判官以破賊功當遷請回授  
幼弟孤姪者三人教義者稱之二十九年河西節度使奏  
授晉昌郡戶曹參軍攝晉昌令轉張掖郡張掖令攝司馬  
知郡事按吏賊罪罪人誣訟於使司百姓苗秀康順忠等  
三十人皆截耳稱冤節度使王捶駭焉奏與上考轉岳州  
長史時屬荒旱人多莩餒君以祿奉職田并率官吏食餓  
者千餘人凡月餘遂多全活劔南節度使楊國忠奏知三  
峽轉運改衡陽郡長史賜緋魚袋天寶末羯胡作亂統江  
湖之兵先至南陽加賜紫金魚袋充魯炆南陽節度副使

攝淮南郡長史充當郡防禦使時南陽爲賊所圍諸將選  
懦莫敢先救至德元載君以當郡防禦士至新野芙蓉鄉  
遇賊合戰斬其將犯圍而入見壯而德之賊圍解加遊擊  
將軍左金吾衛中郎將兼南陽郡司馬遷右驍衛將軍兼  
上洛郡太守充武關防禦使肅宗降璽書云卿以特達之  
姿抱殊常之略武關防守委卿一人屬賊陷商於復圍南  
陽君屯兵於淅川以保人人吏逆賊悉力來攻六十餘日  
糧盡救絕遂陷賊庭賊將甘言休君令至城下以紿君  
忠勇感激舍生徇義抗聲謂君曰鳳翔諸將已收長安瑤

不能效死軍前辱大夫所使願大夫保守忠義克終令圖  
賊以兵刃毆君君志氣彌厲因被執送洛陽今天子收復  
兩京僅得脫禍其事具向城令王瀟南陽記旻又奏君充  
節度兵馬使君遂辭疾不行稅駕於鄭之別墅君所居以  
清白廉慎聞於朝廷祿俸之餘必賙親族之貧者先疇舊  
業悉畀羣從一簪不私於其身又常持誦金剛淨名經向  
逾三紀不茹葷血者十年至是無擔石之儲而處順安時  
不改其度蓋澹如也識者高焉粵以上元二年秋九月十  
四日寢疾而終春秋六十有五夫人高平徐氏安西都護



高平縣公欽識之女婦順母儀克明休德以大厯二年夏  
六月二十五日終於岳州客舍享年五十有六其孤嵩臬  
中子崙少子峯等銜恤允窮竭力襄事以大厯十年冬十  
月二十四日合祔君臬夫人於滎澤縣廣武原遵理命也  
崙不遠千里泣而求蒙敢述無愧之詞式揚不朽之烈銘  
曰

猗那使君世挹清芬顓經飾吏休有令聞天子命我參卿  
西軍驟遷大縣克懋殊勳讓行親睦耳截冤分廩祿食餼  
馳師解紛孤城再色罷卒益振麾守商於移兵浙瀆綢繆

震盪焜耀天文力盡寇多師陷身屯詭詞給賊解路是羣  
脫禍歸朝義高天雪乞骸廷闕稅駕洧溱志敦禪誦茹絕  
羶葷處順齊終聊樂我云刻諸金石永永不泯

欽定全唐文卷三百四十四目錄

顏真卿 九

銀青光祿大夫海瀼饒房睦台六州刺史上柱國  
汲郡開國公康使君神道碑銘

京兆尹御史中丞梓遂杭三州刺史劔南東川節  
度使杜公神道碑銘

和政公主神道碑

杭州錢塘縣丞殷府君夫人顏君神道碣銘

唐故容州都督兼御史中丞本管經略使元君表

墓碑銘 并序

京兆尹兼中丞杭州刺史劔南東川節度使杜公

墓誌銘

曹州司法參軍祕書省麗正殿二學士殷君墓碣

銘

祭姪季明文

祭伯父豪州刺史文

欽定全唐文卷三百四十四

顏真卿九

銀青光祿大夫海濮饒房睦台六州刺史上柱國

汲郡開國公康使君神道碑銘

君諱希鉞字南金其先出於周武王同母少弟衛康叔封  
之後也史記云成王長用事舉康叔爲周司寇賜衛寶祭  
器以彰有德封子康伯支庶有食邑於康者遂以爲氏周  
代爲衛大夫至漢有東郡太守超始居汲郡超之裔孫魏  
強弩將軍權權生晉虎賁中郎將泰泰生闕太守威威生

蘭陵令奮節將軍翼隨晉元帝過江爲吳興郡丞因居烏程事見山謙之吳興記翼生豫章太守鎮鎮生征虜司馬建武將軍欽信欽信生宋晉熙王兵曹參軍黯黯生南臺郎高高生齊驃騎大將軍孟真孟真生梁散騎侍郎僧朗僧朗生陳給事中五兵尚書宗諤爲山陰令子孫始居會稽遂爲郡人焉曾祖孝範江夏王府法曹臨海縣令祖英隋齊王府騎曹江寧縣令皇朝隨郡王行軍倉曹父國安明經高第以碩學掌國子監領三館進士教之策授右典戎衛錄事參軍直崇文館太學助教遷博士白獸門內供

奉崇文館學士贈杭州長史君卽長史府君之叔子也年  
十四明經登第補右內率府胄曹應詞藻宏麗舉甲科拜  
祕書省校書郎轉左金吾衛錄事參軍應博通文史舉高  
第授太府寺主簿轉丞又應明於政理舉拜洛州河清令  
加朝散大夫涇州司馬德州長史轉定州屬突厥侵轢君  
以偏師抗之遷海州刺史上功以敕書賜方岳繡袍一領  
雜綵二百段下車未幾詔擇政術尤異者察使奏公恩制  
褒異遷濮州加銀青光祿大夫累封汲郡開國公策勲上  
柱國轉饒州入爲國子司業以言事貶房州轉睦州遷台

州所至之邦必聞美政開元初入計至京抗表請致仕元宗不許仍留三年請歸鄉敕書褒美賜衣一襲並雜綵等仍給傳驛至本州冬十月二十有二日不幸遘疾薨於會稽覺允里第春秋七十一夫人陳郡殷氏太子中舍人聞禮之曾孫右清道率令德之孫洛州錄事參軍子恩之第五女睿宗先天二年封丹陽郡夫人公薨之年歿於東都章善坊私第春秋六十九嗣子朝散大夫婺州司馬襲汲郡公元瑛會稽縣男元瑾宣州司士京兆府奉先尉會稽縣男元瑒朝議郎前獲嘉丞元瓌等虔以天寶四載七月



四日寔於山陰縣籬渚村之先塋卜遠日而合葬焉禮也  
嗚呼君負不器之姿包周身之智寬仁且惠慤愿而恭金  
玉其相敬明其道文意麗藻二雅所祇政事優長百僚所  
則嘗撰自古以來清白吏圖四卷仍自爲序贊以見其志  
宰相黃門侍郎韋承慶中書舍人馬吉甫等美而同述焉  
盛行於世赴海州時君兄德言爲右臺侍御史弟爲偃師  
令俱以詞學擅名時同請歸鄉拜掃朝野榮之與狄仁傑  
岑羲韋承慶嗣立元懷景姚元崇友善至是咸傾朝同賦  
詩以餞之近代未有此比君之四代祖至於大父爲諸王

掾屬者七人歷尚書郎給事中侍御史者二人君之先君  
崇文學士府君有文集十卷注駁文選異義二十卷漢書  
十卷自述文集二十卷元昆修書學士顯府君文集十卷  
撰詞苑麗則二十卷海藏連珠三十卷累璧十卷姪祕書  
監集賢院侍講學士闕一字一元撰周易異義二十卷秀州長  
史元瓌著干祿寶典三十卷姪刑部員外郎璿男美原尉  
南華撰代耕心鏡十卷闕六字百二十卷君之先君至南華  
四代進士登甲科者七人舉明經者一十三人時君闕五字  
門頗盛美矣君之女曰辨惠蓋厓縣令陝郡長史郃象鉞

之妻君之孫台州司戶參軍

闕三字

先歲而卒汾州司田參

軍真弼德州平昌縣令輔旻崇元學生曙懷州武陟尉儋

宣州南陵尉渭鄉貢明經緯綸皆修身踐言敦詩說禮紹

承餘訓克稟義方及君告老鄒自然陳光璧閭邱景陽陶

暹送至越州邑子謝務遷僧陸鑒校書郎陳齊卿恒爲文

酒之會論者休焉愜求舊之念崇乞言之禮天乎不憖其

恨若何大厯十一年元瓌

闕九字

乞願言刊勒懼沒徽猷求

無愧之詞垂不朽之事顧惟末學曷足當仁銘曰

汲公恂恂德懋而淳濟濟多士東南有筠緝熙代業詞章

發身佐軍貌虎典校麒麟三擢崑玉再司

闕二

鵬翔海汭

驥展河濬驟貳嘉州錫命斯頻繡寵方岳榮加搢紳六登

闕一

洽膠庠

闕六

華墓表申

闕二

見節文昭友仁懸車告

老衣錦頤神連璧襲懿梓澤齊彬饋醕未濟春濛遽淪朝  
廷惋悼遠近悲辛季子象賢恐懼鬱堙嘉猷鴻伐千秋不  
泯

京兆尹御史中丞梓遂杭三州刺史劔南東川節

度使杜公神道碑銘

征鎮四出鑿門之寄崇邦畿千里內史之官最非夫任均

周召名軼趙張則何以展心膂之謀光鉅筭之制者矣公諱濟字應物京兆杜陵人晉征南大將軍當陽侯元凱十四代孫周禮部侍郎殿內監甘棠公懿之來孫隋符璽郎乾祐之元孫皇朝度支員外主客郎中續之曾孫朝散大夫明堂丞贈潤州刺史知讓之孫高陵令贈太子少保惠之第三子也器識通簡履懷坦易以文飾吏用晦而明逗機而舉無遺譖莅事而照有餘地早歲以寢郎從調書判超等爲李吏部彭年所賞補梁州南鄭主簿州主司馬垂爲山南西道採訪使引在幕下俄丁內艱終制轉許州長

社尉楊光翽都督隴西奏公爲法曹皇甫旆採訪江西奏  
公爲推官授大理司直攝殿中侍御史賜緋魚袋尋正除  
殿中俄宰郿縣相國李峴尹京兆奏公爲渭南尉僕射裴  
冕爲劔南節度奏公爲成都令遷絳州刺史賜紫金魚袋  
屬徐知道作亂使裨將曹懷信招公公執以歸朝除戶部  
郎中加朝散大夫廣德中檢校駕部郎中上柱國公善與  
人交於嚴武情均莫逆武再充劔南節度爲武行軍司馬  
郭英乂之代武也矯宣恩命毀元宗宮爲節度使宅公驚  
其異謀移疾不視事今司空冀國公崔寧旣誅英乂請知

使事公堅臥不起仍俾通泉令今前殿中侍御史韋都兵  
密使家僮潛表事實大厯初杜鴻漸分蜀爲東西川公爲  
副元帥判官知東川節度拜大中大夫緜劒梓遂渝合龍  
普等州都防禦使梓州刺史兼御史中丞公以威信馭戎  
寬明莅俗克念八州之地綏靖兩川之人朝廷嘉之尋拜  
東川節度使俄而移軍復爲遂州都督徵拜給事中間歲  
拜京兆少尹明日遷京兆尹出爲杭州刺史不逾周歲風  
化大行不幸感疾又聞代到請尋醫於晉陵以大厯十二  
年歲次丁巳秋七月二日辛亥薨於常州之別館春秋五

十有八夫人京兆韋氏曰平仲房州刺史景駿之孫禮部尚書琅琊王邱之外孫太子中舍迪之第三女也精識高明正家柔克移天有幹夫之蠱宜室多綏族之仁六姻稱其壺則四德被於彤管生五子四女而公卽世夫人晝哭茹毒星言割哀留子壻祕書省校書郎范陽盧少康泉四子匡陟緝寧家殘獨與子楊匍匐萬里以祇護喪櫬冬十一月至上都二十四日壬申虔寔公於萬年縣洪原鄉之少陵原祔先塋也仍自爲祭文以抒意其略曰周旋吳蜀備歷艱危不陷寇難賴君攜持一朝孤立更復何依魚失



水而鱗悴樹無根而葉萎詞理精婉才情懇到聞者傷愍  
焉於戲公以傑俊之材當艱虞之際伸其智略宣力盛時  
頡頏鴛鷺之間總統龍犀之節旋登瑣闥驟陟尹畿方當  
焜燿高衢升凌台序而一麾出守鍛翮江皋竟吉往而凶  
歸齋此志而歿地吾道慚矣真卿何幸得忝維私未終倚  
玉之歡遽切據梧之恨吁足痛也銘曰

杜侯峩峩令聞猗那其用於世爲猷匪他理稱易簡政絕  
煩苛州縣發跡雲霄切摩化存江潯威肅岷嶓巴蜀靖謐  
精誠孔多瑣闥久拜亞尹遄過始陟京兆旋移浙河云如

不弔遘此凶瘥哲婦哭晝護喪奔波祔於先壟映蔚條柯  
曷用表德勒銘墳阿

和政公主神道碑

詩美下降傳書築館貴其中禮載籍稱焉漢魏已還寂寥  
罕嗣以蕩陵德則維其常皇唐勃興王道丕變平陽起娘  
子之軍於司竹襄城行匹庶之禮於宋公常樂亂匡復之  
師於武后皆前古之所未有其或生知禮樂周旋法度躬  
行婦道以懋大倫克順天經光昭懿烈名言之所莫究書  
記之所未聞聚衆美於一身鄰太虛而獨立者其唯和政

公主乎公主姓李氏隴西成紀人皇唐元宗至道大聖大明孝皇帝之孫肅宗文明武德大聖大宣孝皇帝之第二女帝女之崇於斯爲盛今天子之同母妹也母曰章敬皇太后后之在襁褓也后父贈太尉吳君曰令珪嘗遊官蜀中使道士勾規占之規驚起曰此女貴不可言是生二子男爲人君女爲公主嫁於柳氏其後竟配肅宗生今上及公主神所命也厥惟舊哉公主三歲而孤卽能孺慕育於儲妃韋氏純孝過人幼而聰惠長而韶敏穠華秀整令德芬馨婉嫕發於天姿肅雍形於鑒寐奉今上以悌道事韋

妃如所生繇是特爲肅宗之所賞愛至若左右圖史開示  
佛經金石絲竹之音績畫工巧之事耳目之所聞見心靈  
之所領略莫不一覽懸解終身不忘天寶九載春三月旣  
望封和政公主降於河東柳潭旣筭之三載矣潭周太保  
敏之五代孫皇蘄州刺史懷素之曾孫贈祕書監岑之第  
四子衣冠地胄輝映當朝初以美秀承家中以名聲華國  
道勝而貴能下善謙尊而休有烈光士林偉之解褐左內  
率府胄曹轉潁王府戶曹陳留郡司功參軍以人門第一  
選尚公主拜太子洗馬亦旣好合雅相敬貴雖柳侯秉彝

有度能降帝女之心而公主率履由衷每抗古人之節故宗族胥睦不獨親其親先後大同莫敢私其子伯姁宏農楊氏太真姊務華采公主服無金翠之飾居有冰雪之容每至朔月六參朝天旅進嫣然班敘之內迴出神仙之表亦非希企之所及也泉凶羯亂常潼關不守元宗幸蜀妃后駿奔姊曰寧國公主孀嫠屏居誰或訃告乃棄其三子取其夫之乘以乘之柳侯徒行公主愧焉下而同趨者日且百里每臻坎險必先濟寧國而後從之柳侯辭公主曰我若先涉脫有危急不能俱全則棄我姊矣柳侯感歎躬

負薪之役公主怡然親饋餼之事竭力供侍潭兄澄之妻  
楊貴妃之姊也貴倖前朝勢傾天下公主交無諂黷思未  
綢繆楊且云以孤見託馬嵬之役無噍類焉感其一言  
悉力營贍男登服冕之位女獲乘龍之匹出入存恤過於  
已子雖其密親罔或能辨柳之親昵伯仲姑姊隱覲將迎  
唯恐不至糾逖疏屬撫循惇嫠繇內及外終始如一孤窮  
滿目榮悴殊倫居薄推厚未嘗懈倦衣服飲食等無有差  
互或未周嬰孩罔及每至伏臘禘祠蒸嘗必具禮衣花釵  
之飾以躬中饋堂室之奠豈無婢使式燕孫謀姿性純儉

不以迄成先聖休之寶書清問秋八月元宗至蜀仍舊邑  
而冊公主以潭爲駙馬都尉銀青光祿大夫太僕卿屬狂  
將與禍稱兵向闕元宗親御闔閭臨視誅討駙馬率領家  
豎折衝張義童等鬪於門中公主及寧國穀弓迭進駙馬  
乘勝突刃所向無前斬馘擒生殆逾五十節使時宰具以  
表聞元宗自繫誥示先帝懇讓莫當策勲遂寢今上之爲  
元帥也躬擐甲胄率先將卒舉兩京若拾遺摧凶寇如振  
槁勞旋方及帑藏其空公主貿遷有無億則屢中闕嬴優  
而數逾千萬懼不給悉畀縣官論者難之肅宗彌留衆皆

迭侍主獨瞻奉不已於旁帝有間盡而謂之曰汝之純孝  
乃能至是遂賚莊一區帝愛季女曰寶真公主因奏曰八  
妹未有請以賜之泣而諫焉哀動左右西陵遷窆上戒主  
曰凡厥親身之物必誠必信勿之悔焉主罄家有無以邑  
入千萬潛羨經費上深感歎焉上既宅亮陰未忍臨政人  
之疾苦事之得失豈嘗私謁動必以聞上敬異之朝廷賴  
焉廣德元年冬上既東幸主志期扈蹕迴兵充斥咫尺不  
通因至荆南尉薦諸將方隅載謐職貢以修主有力焉上  
之在陝憂主匱乏乃命中使屢敕節度及轉運使隨主所



須務令肅給主以國用空罄退而歎曰吾方竭家財以資  
戰士其能饕餮首冒國經唯請名香數斤賦於佛寺爲主  
祈福而已王公戚屬相攜而至者藍縷膩囊襁負鱗次竭  
其闕其斧親自瞻恤聚而泣之悲感行路初次商於頓於傳  
置羣盜蝟起奄譁譯亭呼而犒之曉以禍福一言革面願  
比家矣之死靡他至今猶在緬惟罔極無所寘哀從母薛  
氏遺孤數四分宅居之皆俾成立萊莘兄弟盡列通班二  
女有行克配良士主之慈忠悉皆若是親臨稼穡躬儉節  
用不憚煩縟雅好組紉馬裳衣必親裁紵爰及子女罔

衣綺紈綻新皆成主手每加訓誨蠢迪檢押廣德二載春  
二月歸於上都諸主高會議際夫黨覲其親族多曠周旋  
咸以爲時經百罹粗略可也主抗詞曰女之移天遂成他  
族怙貴長傲何以律人上方理定聞必不悅諸主蹙然競  
崇討習禮之降殺親之薄厚翕然一變職主之由夏六月  
才生魄屬邊候不謹烽及京師城中震驚圍視無色主旣  
彌月體未甚安曰事亟矣其入言之駙馬請間主曰吾業  
已行矣駙馬獨無兄乎因乘檐子直至寢殿乃悉索闕遺  
備陳利病以奏之上欣然嘉納所言未究傍或員來因爾

退歸遲明誕育展轉怙悵不能弭忘時屬炎暍熱疾有加  
聖情憂軫起坐失次天醫內官相繼旁午彼蒼不惠以其  
月二十有五辛卯薨於常樂坊之私第春秋三十有六  
嗚呼皇上友愛天深痛毒兼至砉然一叫聲淚俱咽哀動  
木石豈伊人倫漣漣孔懷如失於臂曰余此妹國之鴻寶  
方期闕云如何瘞祝降時喪天實爲之胡寧忍予乃輟朝  
三日命京兆尹監護喪事一以官供務從優厚柳侯招膺  
永悼氣索神傷心苦而忽然忘生泣盡而繼之以血況乎  
五男三女或齟或孩呼阿母而哭無常聲籲昊天而仁覆

永絕哺以滋旨噍而莫就其爲酷痛曷愈於斯以是思哀  
哀可知矣自朝及野知與不知聞之失聲罔不震悼棧有  
青牛素服轅軛主之薨也踣地哀鳴仰天屑淚三日不餽  
畜猶若是臣僕可知主之將薨馭馬先殞捐館之夕見夢  
別墅乘之周麾偏勞慙遺俾屏不逮田客僣從數騎久已  
云亡衆皆驚起髣髴猶見雖所憑則厚而精氣何多主於  
駙馬大義敦肅不恃倪天之貴每極家人之禮駙馬雅性  
夷簡恬於名利願究衛生之經庶臻久視之道主志淡婉  
順始慕真宗故於他時並受法錄嘗謂之曰易崇積善詩

貴起予不以忠孝數事迭相告勸者則心有歉焉率而行  
之曷嘗廢墜又以爲死生恒理先後之間若幸啓手足必  
當襚我以道服瘞我於支提往來行言時見存恤則所懷  
足矣子若不諱我若歿身未亾灑掃塋隴出入窀穸奉君  
周旋噫嘻於斯之時以爲謔浪豈悟今者皆符昔言有司  
奉詔將厚其禮駙馬疏陳皆蒙允許粵以秋八月十九日  
甲申臬其男試太常少卿賜紫金魚袋晟鴻臚少卿暈試  
祕書丞賜紫金魚袋杲試殿中丞昱臬子三女等虔窆公  
主於萬年縣義豐之銅人原從理命也於乎風詠歌衣史

稱彤管纖微之善載籍猶稱沉乎七葉帝女分形歸妹貴  
能上下忠以導躬德言容功之四美服女師母儀之訓訂  
之繇古孰與我京昔馬遷著記謂之實錄有道見述亦云  
無愧某學於舊史少識前載歷考長代跋彼疑之盛未有  
如公主者焉雖壺則家風每挹如賓之敬而勤崇垂懿敢  
忘傳信之辭銘曰

穠矣公主元元之緒聖皇之孫肅宗之女今上之妹生人  
之矩德言容功義仁孝忠溫良恭儉敬讓宏通率履弗越  
高明有融下嫁於柳猗那自久金石著明琴瑟斯友家道

以正人倫斯厚鳳凰于飛梧桐是依嚶嚶啾啾福祿攸歸  
和樂旣孺德音莫違麟之趾定振振子姓方紹母師奄摧  
邦令一人痛毒九有違詠詔葬於何銅人之阿支提鬱起  
宰樹誰過空餘好合來往滂沲

杭州錢塘縣丞殷府君夫人顏君神道碣銘

君號真定琅琊臨沂人北齊黃門侍郎之推府君之元孫  
皇朝秦王記室思魯府君之曾孫著作郎宏文崇賢學士  
勤禮府君之孫皇曹王侍讀贈華州刺史昭甫府君之季  
女錢塘丞殷履直之妻也聰惠明達發乎天性孝仁敬讓

迴出人表精究國史博通禮經問無不知德無不備其在  
家也九族仰其壺儀其移天也六姻賴其任恤天后當宁  
旁求女史太夫人殷氏以彤管之才膺大家之選召置左  
右不遑顧復二弟曰祕書監元孫府君太子少保惟貞府  
君藐焉始孩傾隔怙恃君躬自誨育教之詩書悉擅大名  
皆君力也叔父吏部郎中敬仲府君爲酷吏所誣君率二  
妹宜芳令裴安期妻司業岑獻妻割耳訴冤因獲減死又  
誕男成已而左耳缺焉君有三子長曰武康丞嘉紹尤工  
小篆爲寸字飛白勁利絕倫紹子壻郎中柳芳今之良史



芳子太樂令冕幼立盛名次曰處士齊望有成人之姿幼  
曰晉州長史成已雅善填書兼綜才藝鳴謙勇退不登清  
秩每與文士族祖濬武平一呂因李叡陳齊卿族舅斥朝  
內弟曜卿允南姨弟劉璿族弟寅同賦詩多擅警絕之句  
六女長適李氏生安陸令銓孝養於君次適王元淑著漢  
春秋次適蔡九言生燕學生闕爲當代之冠次適顏昭粹  
粹女適司勳郎闕才器爲海內闕揚欽生濯季淮幼適我  
兄闕疑仁親友悌有闕度爲尼感殊闕慈明及女娉真卿  
童孺時特蒙君教言辭音剖闕延壽王孫賦崔氏飛龍篇

江淹造化篇五都賦不幸開元二十五年秋七月有五日  
以隨牒終於成已尉氏尉之公館享年八十四粵以明年  
春正月合祔於東京萬安山之王寶原禮也嗚呼君全德  
內充慈仁外被才明可以升博士法度可以律母師雖偕  
老不俱無石窳魚軒之貴而長筵律慶多鏘鳳乘龍之歡  
於足云也真卿不敏夙承誨誘追湊仁而莫逮謀不朽其  
庶茲銘曰

於惟我姑德盛才儻受湊倫育耳割冤蘇惠及疎賤仁涵  
朽枯子孫宴喜龍鳳相趨教我音辭王孫五都期頤未究

人世俄殊刻石墳阿聲流八區

唐故容州都督兼御史中丞本管經略使元君表

墓碑銘

并序

嗚呼可惜哉元君君諱結字次山皇家忠烈義激文武之  
直清臣也蓋後魏昭成皇帝孫曰常山王遵之十二代孫  
自遵七葉王公相繼著在惇史高祖善禕皇朝尚書都官  
郎中常山郡公會祖仁基朝散大夫襲信令襲常山公祖  
利貞霍王府參軍隨鎮改襄州父延祖清淨恬儉歷魏成  
主簿延唐丞思閒輒自引去以魯縣商餘山多靈藥遂家

焉及終門人諡曰太先生寶應元年追贈左贊善大夫君  
聰悟宏達倜儻而不羈十七始知書乃授學於宗兄先生  
德秀常著說楚賦三篇中行子蘇源明駭之曰子居今而  
作真淳之語難哉然世自澆浮何傷元子天寶十二載舉  
進士作文編禮部侍郎陽浚曰一第汙元子耳有司得元  
子是賴遂登高第及羯胡首亂逃難於猗玗洞因招集鄰  
里二百餘家奔襄陽元宗異而徵之值君移居灤溪乃寢  
乾元二年李光弼拒史思明於河陽肅宗欲幸河東聞君  
有謀略虛懷召問君悉陳兵勢獻時議三篇上大悅曰卿

果破賊朕憂遂停乃拜君左金吾兵曹攝監察御史充山  
南東道節度參謀仍於唐鄧汝蔡等州招緝義軍山棚高  
晃等率五千餘人一時歸附大壓賊境於是思明挫銳不  
敢南侵前是泌南戰士積骨者君悉收瘞刻石立表命之  
曰哀邱將吏感焉無不勇勵璽書頻降威望日崇時張瑾  
殺史翺於襄州遣使請罪君爲奏聞特蒙嘉納乃真拜君  
監察仍授部將張遠帆田瀛等十數人將軍屬荆南有專  
殺者呂諲爲節度使諲辭以無兵上曰元結有兵在泌陽  
乃拜君水部員外郎兼殿中侍御史充諲節度判官君起

家十月超拜至此時論榮之屬道士申泰芝誣湖南防禦使龐承鼎謀反並判官吳子宜等皆被決殺推官嚴郢坐流俾君按覆君建明承鼎獲免者百餘家及譴卒淮西節度使王仲鼎爲賊所擒裴茂與來瑱交惡遠近危懼莫敢誰何君知節度觀察使事經八月境內晏然今上登極節度使留後者例加封邑君遜讓不受遂歸養親特蒙褒獎乃拜著作郎遂家於武昌之樊口著自釋以見意其略曰少習靜於商餘山著元子十卷兵起逃難於猗玗洞著猗玗子三篇將家灤濱乃自稱浪士著浪說七篇及爲郎時

人以浪者亦漫爲官乎遂見呼爲漫郎著漫記七篇及家

樊上漁者戲謂之聲叟

闕入字

又以君漫浪於人間或謂之

漫叟歲餘上以君居貧起家爲道州刺史州爲西原賊所  
陷人十無一戶纔滿千君下車行古人之政二年間歸者  
萬餘家賊亦懷畏不敢來犯旣受代百姓詣闕請立生祠  
仍乞再留觀察使奏課第一轉容府都督兼侍御史本管  
經略使仍請禮部侍郎張謂作甘棠頌以美之容府自艱  
虞以來所管皆固拒山谷君單車入洞親自撫諭六旬而  
收復八州丁陳郡太夫人憂百姓詣使請留大厯四年夏

四月拜左金吾衛將軍兼御史中丞管使如故君矢死陳  
乞者再三優詔褒許七年正月朝京師上澣禮重方加位  
秩不幸遇疾中使臨問者相望夏四月庚午薨於永崇坊  
之旅館春秋五十朝野震悼焉二子以方以明能世其業  
名雖著而官未立以其年冬十一月壬寅虔葬君於魯山  
青嶺泉陂原禮也嗚呼君其心古其行古其言古躬是三  
者而見重於今雖擁旌麾幢總戎於五嶺之下彌綸秉憲  
對越於九重之上不爲不遇然以君之才之德之美竟不  
得專政方面登翼泰階而感激者不能不爲之太息也君



雅好山水聞有勝絕未嘗不枉路登覽而銘贊之感中行  
見知之恩及亾至今分宅以恤其子其不偷也多此類中  
書舍人楊炎常袞皆作碑誌以抒君之志業故吏大足令  
劉袞江華令瞿令問故將張滿趙溫張協王進興等感念  
恩舊皆送哭以終葬竭資鬻石願垂美以述誠眞卿不敏  
常忝次山風義之末尚存盡往敢廢無媿之辭銘曰  
次山斌斌王之蓋臣義烈剛勁忠和儉勤炳文華國孔武  
寧屯率性方直秉心眞純見危不撓臨難遺身允矣全德  
今之古人奈何清賢素志莫伸羣士立表垂聲不泯

京兆尹兼中丞杭州刺史劔南東川節度使杜公

墓誌銘

九有無虞行師貴於衽席四方取則鉤鉅資乎浩穰誰其  
有之則杜公其人矣公諱濟字應物京兆杜陵人皇主客  
郎中續之曾孫明堂令知讓之孫贈太子少保惠之第三  
子姿度韶舉心靈敏達在家必聞旣蘊睦親之志所居則  
化多稱不器之能解褐南鄭主簿州主司馬垂引在使幕  
轉長社尉隴西法曹皇甫旆江西採訪奏爲推官授大理  
司直攝殿中侍御史賜緋魚袋尋正除殿中歷宰郿渭南

成都三縣緜州刺史賜紫金魚袋戶部郎中加朝散大夫  
廣德中檢校駕部郎中上柱國充嚴武劔南行軍司馬杜  
鴻漸分蜀爲東西川以公爲副元帥判官知東川節度拜  
大中大夫緜劔梓遂都防禦使梓州刺史兼中丞時寇盜  
充斥公示以威信八將之不隕公之力焉尋拜東川節度  
使俄而移軍復爲遂州都督徵拜給事中間歲拜京兆少  
尹明日遷京兆尹出爲杭州刺史公務清簡庭落若無吏  
焉不幸感風疾以大厯十二年歲次丁巳秋七月二日辛  
亥薨於常州之別館春秋五十有八夫人京兆韋氏太子

中舍迪之第三女也沈敏精淡高明柔克幹夫之蠱以懋厥家生五子四女而公卽世夫人星言晝哭躬護櫬轡與子楊以冬十一月二十有四日壬申歸窆公於萬年縣洪原鄉之少陵原祔先塋也嗚呼以公之志業才力宜其振揮鱗鬣凌厲清浮而命途成山功虧長世吁足恨也真卿忝居友壻亟接周行痛音徽之永隔感存歿其何已銘曰  
藹藹禹禹時維杜公業光臺省政洽軍戎乃尹京兆乃麾江東帝方俟理命則不融內子護喪哀哀送終

曹州司法參軍祕書省麗正殿二學士殷君墓碣

銘

善父母之謂孝睦昆友之謂悌孝悌也者其仁之本歟經  
天緯地之謂文博古知今之謂學文學也者其德之蘊歟  
誰其兼之卽我伯舅殷君其人矣君諱踐猷字伯起陳郡  
長平人五代祖不害以孝見梁書高祖英童周御正中大  
夫麟趾學士曾祖聞禮唐太子中書舍人宏文館學士祖  
令言校書郎淄川令父子敬太常博士吳令累葉皆以德  
行名義儒學翰墨聞於前朝君卽吳縣之元子幼而聰悟  
絕倫長而典禮不易年十三日誦左傳二十五紙讀稽聖

傳一遍亦誦之博覽羣言尤精史記漢書百家氏族之說  
至於陰陽數術醫方刑法之流無不該洞焉與賀知章陸  
象先我伯父元孫韋述友善賀呼君爲五總龜以龜千年  
五聚問無不知也君性方正志業淳淡識理清遠人皆望  
而服之解褐杭州參軍刺史宋璟以相國之重簡貴自居  
無所推揖每見君必特加禮敬凡政事之諉誣者皆咨決  
焉開元初舉文儒異等授祕書省學士尋改曹州司法參  
軍麗正殿學士與韋述袁暉同修王儉今書七志及羣書  
四錄流別銓次皆折衷於君璟與蘇頌旣入相每引君詢

以當代之務友于兄弟羣從宗黨必盡紉綏之恩長妹蘭陵郡太夫人真卿先妣也中年孀嫠遺孤十人未能自振君悉心訓獎皆究恩意故能長而有立開元九年秋七月九日有叔父臨黃尉子元之喪哀慟嘔血終於京師通化坊之私第夫人蘭陵蕭氏司空瑀之元孫括州司馬宋國公興宗之女賢和齊肅秉修禮度能讀論語周易泛觀史傳率諸婦以和義故閨範修睦焉君之捐館以清白留遺家道索然夫人躬甘菲糲勸勉桑穡晏息晨興以率勵僮僕行之數歲經費羨焉敎誨三子攝寅克齊等皆克負荷

攝大斌令克齊高平尉爲真卿河東覆屯軍試判官並不  
幸早世寅聰達有精識能繼先父之業有大名於天下舉  
宏詞太子校書永寧尉箠殺謾吏貶移澄城丞久疾將歿  
顧瞻太夫人欲訣不忍其子監察御史亮年未志學隱而  
潛盡之及寅卒斬指翦髮寘於棺中誓事太夫人不敢渝  
常日及有疾不脫衣帶者數年故白燕巢於苦楸乾元元  
年太夫人季女適於邠州司馬陸超板輿隨牒俄而邁疾  
三月朔日終於超之官舍春秋八十有一龜筮未從因權  
殯於三水亮以校書郎遷壽安尉爲真卿荆南節度推官



廣德二年十有二月與弟今榮陽尉永甫畝徒步力護雙  
櫬合祔君夫人於新安縣之龍澗原三子塋從理命也嗚  
呼以君之才之美被服純行加人數等清修素業爲代元  
龜竟不得贊皇極而叶彛倫登泰階而儀百辟不其惜乎  
嗟乎仲尼聖者也終於魯司寇而君官與之比公明達者  
也年纔四十八而君壽與之齊豈聖賢之道有遭遇乎將  
運命之數有窮通乎茲小子所以獻疑而述報施也大厯  
五年夏五月眞卿以恩宥刺撫於州採石刻頌丹寄碣於  
墓左銘曰

殷之後昆奕葉儒門盛烈存兮君能濟美於穆不已明德  
尊兮運促道長身歿名揚教義敦兮合祔先寔述遵理命  
哀順孫兮高墳崔嵬龍澗之隈映鮮原兮斯焉寔止以望  
君子慰營魂兮

祭姪季明文

維乾元元年歲次戊戌九月庚午朔三日壬申第十三叔  
銀青光祿大夫使持節蒲州諸軍事蒲州刺史上輕車都  
尉丹陽縣開國侯真卿以清酌庶羞祭於亡姪贈贊善大  
夫季明之靈惟爾挺生夙標幼德宗廟瑚璉階庭蘭玉每

慰人心方期戢穀何圖逆賊間疊稱兵犯順爾父竭誠常  
山作郡余時受命亦在平原仁兄愛我俾爾傳言爾旣歸  
止爰開土門土門旣開凶威大蹙賊臣不救孤城圍逼父  
陷子死巢傾卵覆天不悔禍誰爲荼毒念爾遘殘百身何  
贖嗚呼哀哉吾承天澤移牧河東泉明比者再陷常山攜  
爾首櫬及茲同還撫念摧切震悼心顏方俟遠日及爾幽  
宅魂而有知無嗟久客嗚呼哀哉尚饗

祭伯父豪州刺史文

維乾元元年歲次戊戌十月庚子朔廿一日庚申第十三

姪男銀青光祿大夫使持節饒州諸軍事饒州刺史上輕  
車都尉丹陽縣開國侯真卿敢昭告於亾伯故朝議大夫  
豪州刺史府君之靈曰日者羯胡祿山侵擾河洛生靈塗  
炭兵甲靡夷二兄杲卿任常山郡太守忠義憤發首開土  
門擒斬逆豎挫其凶慝先蓋授衛尉卿兼御史中丞城孤  
援絕身陷賊庭聖朝哀榮褒贈太子太保甥姪八人季明  
盧逖等被賊害者並贈五品京官嫂及兒女皆被拘囚睿  
略昭宣宇宙清廓脫於賊手並得歸京真卿比在平原遭  
罹凶逆與杲卿同心協德亦著微誠二聖憫焉授戶部侍

郎河北採訪招討使又遷工部憲部二尚書再兼御史大夫出爲同蒲饒三州刺史聖恩錫類大父贈華州刺史兄弟兒姪盡蒙國恩允南授膳部郎中允臧授侍御史威明試太僕丞類受太子洗馬頂授協律郎類授祕書省校書郎賜緋魚袋泉明顥頴等並蒙遷改一門之內生死哀榮真卿時赴饒州至東京得申拜掃又方遠辭違伏增感咽謹以清酌庶羞之奠以伯母河南縣君元氏配尚饗